



JUMUIYA YA ROZARI HAI MTANDAONI-TANZANIA



NOVENA KWA MAMA BIKIRA MARIA MPALIZWA MBINGUNI 6-14 AGOSTI

1. SEKWENSIA

1. Uje Roho Mtakatifu,
tuangaze toka mbingu,
Roho zetu kwa mwangao.
2. Uje Baba wa maskini,
uje mtoa wa vipaji,
Uje mwanga wa mioyo.
3. Ee Mfariji mwema sana,
Ee rafiki mwanana,
Ewe raha mustarehe.
4. Kwenye kazi u pumziko,
kwenye joto, burudisho,
U mfutaji wa machozi.
5. Ewe mwanga wenye
heri, uwajaze waamini,
Neema yako mioyoni.
6. Bila nguvu yako wewe,
mwanadamu hana kitu,
Kwake yote yana kosa.
7. Osha machafuko yetu,
panyeshee pakavu petu,
Na kuponya majeraha.
8. Ulegeze ukaidi,
pasha moto wa ubaridi,
Nyosha upotevu
wote.
9. Wape waumini wako,
wenye tumaini kwako,
Paji zako zote saba.
10. Wape tuzo ya fadhila,
wape mwisho bila
hila,
Wape heri ya milele.
11. Amina aleluya,
amina aleluya,
Amina aleluya.

2. SALA YA MWANZO

Bwana Yesu Kristu, umeishinda nguvu ya kifo na kutujalia tumaini la maisha ya milele. Ulimjalia Mama Yako nafasi ya pekee katika Utukufu wako, na hukuruhusu uharibifu uguse mwili Wake. Tunapofurahi katika Kupalizwa mbinguni Bikira Maria, tuimarisha katika ushindi wa maisha dhidi ya kifo AMINA

Nia za Novena:

i.Kwa ajili ya Amani ya Ulimwengu:

Ee Mama Mpenzi Bikira Maria Mpalizwa mbinguni tunaweka nchi yetu na Ulimwengu mzima chini ya ulinzi wako wa Ki-mama, Utuombe tujaliwe Amani. Tunakuomba mama utuombe kwa mwanao Yesu uponyaji wa janga la Virusi vya Corona duniani.

ii.Kwa ajili ya uongofu wa wakosefu

Kwa maombezi yako Ee Mama Mpalizwa mbinguni, Mwenye Huruma, wakosefu wapate neema na mwanga wa kugeza mawazo na mienendo yao, wajaliwe toba ya kweli, wachukue hatua za kuelekea kupata Huruma ya Mungu.

iii.Kwa ajili ya Kanisa:

Tunaliomba Kanisa Takatifu la Mungu, uliangalie na kulilinda liendee kutumulikia nuru na mwanga wa kutuanguzia katika safari yetu ya kumwendea Mungu.

iv.Kwa ajili Viongozi wa Kanisa na Viongozi wa Serikali zote Duniani

Tunawaweka mikononi Mwako Ee Mama Mpalizwa mbinguni; Baba Mtakatifu, Maaskofu, Mapadre na Watawa, Mungu awaimarisha na kuwajalia neema ili kwa njia ya uongozi wao roho nyingi zifike kwa Mungu. Tunawaweka viongozi wote wa Serikali ya Jamuhuri ya Muungano wa

Tanzania, Bunge na Mahakama ili wajawe na Mapaji ya Roho Mtakatifu katika utoaji wa maamuzi na utungaji sera za maendeleo ya Taifa la Tanzania kadhalika viongozi wa mataifa ya Ulimwengu mzima.

v. Kwa ajili ya Familia:

Tunakutolea familia zetu Ee Mama Bikira Maria, Malkia wa familia, tujaliwe fadhila za imani, matumaini na mapendo. Kwa maombezi yako ee Mama mpole kila mwanafamilia atambue wajibu wake na kuutimiza kwa mapendo na utukufu wa Mungu ili familia zetu zifanane na familia Takatifu ya Nazareti ya Yesu, Maria na Yosefu.

vi. Kwa ajili ya Utume wa walei katika Kanisa :

Mama na mwalimu wa Yesu Kristu, kwa mapendo ya mama, uvilee, uvielekeze, uvitunze, uvilinde, uvistawishe, uviongoze na kuviimarisha vyama vyote vya kitume ndani ya Kanisa. Na kwa maombezi yako Ee Mama mpenzi waumini wote tujaliwe mwamko wa utume na kutimiza vyema wajibu wetu katika Kanisa.

vii. Kwa ajili ya Wenye shida:

Bikira na Mama, tunawaombea wagonjwa wapone, wakosefu watubu, waasi warudi nyumbani kwa Baba. Na marehemu wa toharani warehemiwe wapumzike kwa amani.

Tuombe: (kadiri ya siku)

Siku ya kwanza

Bikira mwenye Moyo Safi, Mama wa Bwana Wetu Yesu Kristu na Mama yetu, tunaamini katika kupalizwa kwako kwa ushindi mbinguni, ambako malaika na watakatifu wanakutukuza kama Malkia wa mbingu na nchi. Tunaungana nao katika kukusifu, na tunamtukuza Mungu aliyekuinua juu ya viumbe vyote. Pamoja nao tunakuheshimu. Tuna hakika kwamba unasimamia maisha yetu ya kila siku na tunakuomba utusaidie sasa.

Tunatulizwa na imani yetu katika ufufuko ujao na tunategemea sala zako na kitulizo. Baada ya maisha ya hapa duniani, utuonyeshe Yesu mzao wa tumbo lako. Ee mpole ,ee mwema, ee mpendelevu Bikira Maria.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni, utuombee Amina

Siku ya Pili

Bikira Maria uliyepalizwa mbinguni, tunakuheshimu kama Malkia wa mbingu na nchi Kama ulivyoonja machungu ya maumivu na mateso ya Mwanao hapa duniani, sasa unafurahia faraja ya milele pamoja naye mbinguni.

Tunamsifu Bwana wetu YesuKristu kwa kutupa sisi Mama mpendelevu kama Wewe.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni,utuombee. Amina

Siku ya tatu

Ewe Mama uliyepalizwa mbinguni, kwa kuwa ulishiriki mafumbo yote ya ukombozi wetu, Yesu amekutuza Utukufu. Kwa nguvu ya maombi yako tusaidie ee Mama mpendelevu kuwasilisha shida zetu kwa Yesu Bwana Wetu.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombee . Amina

Siku ya nne

Mama mpendwa Maria uliyepalizwa mbinguni, Mungu alikuwekea mkono wake wa kulia, ili uweze kuwasaidia watoto wake, kama Mama wa Mungu.

Katikati ya Watakatifu unasimama kama Malkia Wao na wetu, karibu na Mungu kuliko kiumbe chochote. Unawaombea watoto wako na kutujalia kila Baraka aliyojipatia Mkombozi wetu juu ya msalaba. Tafadhali tusaidie katika mahitaji yetu na muombe Bwana Yesu atujalie tunayoomba iwapo ni kwa manufaa ya roho zetu

Sali Rozari Takatifu Mafumbo ya Utukufu

Sali Litania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombe . Amina

Siku ya tano

Ewe Mama Mpendelevu na mwenye huruma, tunaomba utukufu na uzuri wako vijaze mioyo yetu, chukizo dhidi ya malimwengu, na ari kubwa ya furaha ya mbinguni. Macho yako ya huruma yaangaze chini kwenye mapambano na madhaifu yetu katika hili bonde la machozi. Basi Mama mpendelevu, sikia ombi letu na msihi Bwana Yesu kwa ajili yetu. Tuvishe vazi lako safi la upendo na neema hapa, na umilele na utukufu mbinguni

Sali Rozari Takatifu Mafumbo ya Utukufu

Sali Litania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombe . Amina

Siku ya sita

Maria, Mama Yetu Mpendwa na Malkia Mkuu, chukua na poka mioyo yetu maskini, pamoja na utashi na matamano yake, pamoja na neema na Baraka inayoweza kujaliwa. Yote tulivyo, na yote tunayoweza kuwa, yote tuliyo nayo katika hali ya asili na ya neema tumepokea kutoka kwa Mungu kwa njia ya msaada wako. Tusaidie Mama, tumkabidhi Mungu yote, pamoja na maombi yetu. Mama Yetu na Malkia, katika mikono yako mitakatifu tunayaweka yote.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombee . Amina

Siku ya saba

Bikira Maria, Malkia wa kila moyo, pokea yote tulivyo, na utufunge kwa Yesu kwa vifungo vya upendo ili tuwe wako milele, na tuweze kusema kwa ukweli “ Mimi ni wa Yesu kupitia kwa Maria”

Mama Yetu uliyepalizwa mbinguni, na Malkia wa ulimwengu, Bikira daima, Mama wa Mungu, tupatie tunayoomba, iwapo ni kwa Sifa na Utukufu wa Mungu na kwa faida ya roho zetu. Mama Yetu uliyepalizwa mbinguni tunakupenda. Tujalie upendo zaidi kwa Yesu na kwako.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombee . Amina

Siku ya nane

Mama Maria uliyepalizwa mbinguni, tuna furaha kwamba wewe ni Malkia wa mbingu na dunia. Umempa Mungu “nitendewe ulivyonena” yako na kuwa Mama wa Mkombozi. Tuombee amani na wokovu kwa njia ya sala zako, kwa kuwa umemzaa Kristu Bwana wetu mwokozi wa wanadamu. Hivyo basi tupelekee shida zetu mbele ya kiti cha enzi.

Sali Rozari Takatifu Mafumbo ya Utukufu

Sali Lltania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombee . Amina

Siku ya tisa

Mbarikiwa Mama uliyepalizwa mbinguni, baada ya miaka ya ushahidi- bingwa hapa duniani tunafurahi kwamba hatimaye umefikishwa kwenye kiti ulichotayarishiwa mbinguni na Utatu Mtakatifu. Inua mioyo yetu katika utukufu wa kupalizwa kwako, mbali na machafu na madoa ya dhambi. Tufundishe jinsi dunia ilivyo ndogo inapotazamwa kutoka mbinguni. Tuwezeshe kuelewa kwamba kifo ni mlango wa ushindi ambao tutapitia kufika kwa Mwanao na kwamba siku moja miili yetu itaunganika na roho zetu katika Heri ya milele mbinguni.

Kutoka duniani humu tunamopita kama mahujaji, tunaategemea msaada wako. Kwa heshima ya kupalizwa kwako mbinguni tunaomba utusaidie. Saa ya kifo chetu tuongoze kwa usalama hadi kwa Yesu, kuufurahia Uso wa Mungu kwa milele yote pamoja na wewe. Tuombee tustahilishwe ahadi za Kristu

Sali Rozari Takatifu Mafumbo ya Utukufu

Sali Litania ya Bikira Maria Mpalizwa Mbinguni.

Sali sala ya Mwisho.

Wimbo.

Malkia uliyepalizwa mbinguni utuombee . Amina

3.ROZARI YA UTUKUFU SIKU ZOTE.

4.LITANIA YA MAMA BIKIRA MARIA MPALIZWA MBINGUNI

Litania ya Bikira Maria Mpalizwa Mbinguni

Bwana Utuhurumie

Kristo Utuhurumie

Bwana Utuhumie

Kristo utusikilize

Kristo kwa neema yako utusikie

Baba wa mbinguni MunguUtuhurumie

Mungu Mwana, Mkombozi wa Ulimwengu Utuhurumie

Mungu Roho Mtakatifu Utuhurumie

Utatu Mtakatifu Mungu Mmoja Utuhurumie

Maria Mtakatifu Utuombee

Mama Mtakatifu wa Mungu Utuombee

Bikira Mtakatifu Mkuu wa mMabikira Utuombee

Ee Malkia uliyepalizwa Mbinguni, utuombee ili mioyo yetu daima iwe
Mbinguni

Ee Malkia ulipalizwa Mbinguni, utuombee ili tusivurugwe na malimwengu

Ee Malkia uliyepalizwa Mbinguni, utuombee ili daima tumtafute Mungu kabla ya
mambo mengine yote.

Ee Malkia uliyepalizwa Mbinguni, utuombee kusudi tumpende Mungu kuliko
mambo mengine yote.

Ee Malkia uliyepalizwa Mbinguni, utuombee kusudi tuyatafute mapenzi ya
Mungu kuliko mapenzi yetu wenyewe.

Ee Malkia uliyepalizwa Mbinguni, utuombee ili tuwe juu zaidi ya mambo na
faraja za kidunia

Ee Malkia uliyepalizwa Mbinguni, utuombee ili mazungumzo yetu daima yawe
ya Mbinguni.

Ee Malkia uliyepalizwa mbinguni, utuombee ili mioyo yetu iwe daima
minyenyekevu

Ee Malkia uliyepalizwa Mbinguni, utuombee ili akili na mawazo yetu yapende kutawaliwa na mambo ya kimbingu

Ee Malkia uliyepalizwa Mbinguni, utuombee ili mawazo na mioyo yetu daima iwe safi.

Ee Malkia uliyepalizwa Mbinguni, utuombee ili tuweze kudharau mambo ya dunia na kupenda yale ya mbinguni

Ee Malkia uliyepalizwa Mbinguni, utuombee ili tuweze kuwa na majuto ya kweli kwa dhambi zetu

Ee Malkia uliyepalizwa Mbinguni, utuombee ili tuzae matunda mazuri ya toba

Ee Malkia uliyepalizwa Mbinguni, utuombee ili tuongezewe ujuzi wa kukufahamu

Ee Malkia uliyepalizwa Mbinguni, utuombee ili mapendo yetu kwako yaongezeke

Ee Malkia uliyepalizwa Mbinguni, utuombee ili tukutumike vizuri zaidi kwa nyakati zijazo

Ee Malkia uliyepalizwa Mbinguni, utuombee ili tuchukie dhambi kuliko kitu kingine chochote

Ee Malkia uliyepalizwa Mbinguni, , utuombee ili tuweze kutunza neema za Mungu ndani ya roho zetu

Ee Malkia uliyepalizwa Mbinguni, utuombee ili tudumu katika neema hadi kifo chetu

Ee Malkia uliyepalizwa mbinguni utuombee ili baada ya maisha haya tuungane nawe Mbinguni

Ee Malkia uliyepalizwa Mbinguni, utuombee ili tuweze kuokoa roho zetu

Mwanakondoo wa Mungu uondoaye dhambi za ulimwenguUtusamehe
Ee Bwana

Mwanakondoo wa Mungu uondoaye dhambi za ulimwengu
utusikilize Ee Bwana

Mwanakondoo wa Mungu uondoaye dhambi za ulimwengu Utuhurumie

K. Utuombee Ee Malkia uliyepalizwa mbinguni

W. Ili tustahilishwe ahadi za Kristo

Tuombe

Ee Mungu Mwenyezi wa Milele uliyemchukua mbinguni mwili na roho Bikira Maria asiye na Doa, Mama wa Mwanao Bwana wetu Yesu Kristu, tunakuomba na kukusihi kwa kuweka dhamira thabiti ya kutaka mbingu iwe lengo la maisha yetu, tujaliwe kuhesabiwa miongoni mwa wanaostahili kuungana naye katika utakatifu. Tunaomba hayo kwa njia ya Yesu Kristo Mwanao. Amina.

5. SALA YA MWISHO:

Mbarikiwa Mama Bikira Maria uliyepalizwa mbinguni, baada ya miaka ya ushahidi- bingwa hapa duniani tunafurahi kwamba hatimaye umefikishwa kwenye kiti ulichotayarishiwa mbinguni na UtatuMtakatifu. Inua mioyo yetu katika utukufu wakupalizwa kwako, mbali na machafu na madoa ya dhambi. Tufundishe jinsi dunia ilivyondogo inapotazamwa kutoka mbinguni. Tuwezeshe kuelewa kwamba kifoni mlango wa ushindi ambao tutapitia kufika kwa Mwanaona kwamba siku moja miili yetu itaunganik na roho zetu katika Heri ya milele mbinguni. Kutoka duniani humu tunamopita kama mahujaji, tunaategemea msaada wako. Kwa heshima ya kupalizwa kwako mbinguni tunaomba utusaidie. Saa ya kifo chetu tuongoze kwa usalama hadi kwa Yesu, kuufurahia Uso wa Mungu kwa milele yote pamoja na wewe. Tuombee tustahilishwe ahadi za Kristu.Amina

6. WIMBO

*(K) Ishara kubwa imeonekana mbinguni X 2 Mwanamke aliyevikwa jua
(pia) na mwezi chini ya miguu yake, na taji la nyota kumi na mbili juu ya
kichwa chake X 2*

- 1 Tufurahie sote katika Bwana / tunapoadhimisha sikukuu kwa heshima ya Bikira Maria.
- 2 Jeshi la malaika washangilia / pia wafurahia kupalizwa mbinguni kwake Bikira Maria.
- 3 Bwana amefunua wokovu wake kati ya mataifa / ameidhihirisha haki yake juu yao.
- 4 Atukuzwe Baba pia na Mwana na Roho Mtakatifu / kama mwanzo sasa na siku zote na milele.

7..TUNAKIMBILIA ULINZI WAKO ... / WIMBO

Kuandaliwa na Rozari Hai Mtandaoni-Tanzania, 2021

Simu:+255-558-222/ +255-754-283-940

Baruapepe: rozarihaitanzania@gmail.com

Tovuti: www.rozarihai.or.tz



Avee!
Maria!

Mapendo ni ya Milele.

Tusali Daima.

Sala ni Mafuta Ya Safari ya Utakatifu.